



Inatsisartunut ilaasortaq Mikivsuk Thomassen, Inuit Ataqatigiit  
/maani

27-06-2022

Suliap nr.: 2022 - 13008

ID. nr. 77390728

## **Qeqertani KNR-ip aallakaatittagaannik aallakaatitsisarneq pillugu § 37 naapertorlugu apeqquteqaammut 2022-123-mut akissut**

Asasara Mikivsuk Thomassen

Postboks 909

3900 Nuuk

Tlf.: (+299) 34 50 00

E-mail: box909@nanoq.gl

www.naalakkersuisut.gl

Qeqertani KNR-ip aallakaatittagaannik aallakaatitsisarneq pillugu Inatsisartut suleriaasianni § 37 naapertorlugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

### **Apeqqut 1. Naalakkersuisut Qaanaap nunaqarfiani qeqertani KNR radio-p aallakaatinneqarsinnaannginneranut suna tunngaviunersoq ilisimasaqarpat?**

**Akissut:** Tusass paasissutissiivoq FM-raatiunut nalinginnaasunut Qeqertani KNR-ip aallakaatittagaannik aallakaatitsisoqartanngitsaq aammalu aallakaatitsisoqartarsimanani. Ungasissumut nalunaarasuartaatitigut attaveqaqatigiinnissamut attaveqaasersuutiniq nunaqarfimmut aallakaatitassanik ingerlatitsinnaasunik peqarnissaa tamatumunnga pisariaqarpoq. Qeqertani taamaattoqanngilaq. Taamaattorli Tusass naliliivoq pitsaasumik antenneqaraanni AM raatiumik mellembølge aqutugalugu KNR raatiup tusaaneqarsinnaanera ilimanartoq.

Qeqertanut tunngatillugu immikkuullarissunik piumasaqaateqartoqassappat, tamatumunnga tapiliussamik isumaqatigiissuteqarnissaq pisariaqarpoq. Qeqertanut ungasissumut attaveqaqatigiinnissamut attaveqaasersuutiniq pilersitsinissaq tassani ilaatinneqarnersoq, nunap karsianut aningaasartuutissanut tamanna apeqqutaavoq. Tamannalu suliaq Naalakkersuisunit misissorneqassaat aamma partiit suleqatigalugit.

#### **a. Ilisimaqarsimagunik sooruna aallakaatinneqarsinnaanngitsaq?**

**Akissut:** Takuuk apeqqummut 1-imut akissut.

#### **b. Siunissami KNR radio qulakkeerneqassava aallakaatinneqartarnissaa?**

**Akissut:** Naalakkersuisut apeqqut isummerfigisimannngilaat. Qeqertanut ungasissumut nalunaarasuartaatitigut attaveqaqatigiinnissamut attaveqaasersuutiniq pilersitsisoqassappat, Tusass KNR-ip aallakaatitaannik aamma Qeqertanut aallakaatitsisassasoq Naalakkersuisut naatsorsuutigaat.

Aammattaaq takuuk apeqqummut 1-imut akissut.

## **Apeqquut 2. Naalakkersuisut Qeqertanut attaveqaatit atulersinneqarnissaannut sulissuteqassamaarpat Telefon-nit attavilernissaannut?**

**Akissut:** Paasissutissiissutigisinnaavara Naalakkersuisut nalunaarasuartaateqarnermut suliassaqarfimmut politikimik suliaqaleruttormata, tassani ilaatigut sumiiffinni ingerlatsinissamut akuersissuteqarfigineqartuni Tusass-ip pilersuisussaataitanera isummerfigineqartussaalluni. Siunertaavoq innuttaasut nalunaarasuartaatitigut attaveqaqatigiinnermut sumi aammalu qanoq annertutigisumik assigiissaartumik periarfissaqarnissaannik qulakkeerinissaq.

Taamaattumik naatsorsuutigaara nalunaarasuartaateqarnermut politikki aallaavigalugu ukiup tulliani nalunaarut suliarineqassasoq, tassani Qeqertanut nalunaarasuartaatitigut attaveqaqatigiinneq pillugu apeqquut aalajangiiffigineqassalluni.

Tamatumuunalu ilisimatitsissutigisinnaavara nalunaarasuartaatitigut attaveqaatinik pilersitsinissamut, Qaanaap aamma Qeqertat akornanni sakkortusaavimmik ataatsimik arlalinnilluunniit ilusilimmik ungasissumut attaveqaqatigiinnissamut atortulersuutinik pilersitsinissaq pisariaqartoq. Tusass-ip missiliorpaa sakkortusaavimmik taamaattumik pilersitsinissaq marlunnik kisitsisitalimmik millioninik aningaasartallinnik akeqartussaasoq, kiisalu ukiumut ingerlatsinermut aningaasartuutit, ilaatigut satellit-imik attartornermut, akuttunngitsumik sullissilluni takusaasarnissanut immaqalu kukkuneqarnerani timmisartornernut 2 mio. koruuningajannik annertussuteqartussaasut.

Tusass naliliivoq siunissami satellit-inut suliassaqarfimmi teknologiikkut ineriartorneq sumiiffinnut Qeqertatut ittunut nalunaarasuartaatitigut attaveqaqatigiinnermut nutaanik periarfissaqalersitsisussaasoq.

### **a. Attaveqaatinik inersaassamaarpat?**

**Akissut:** Takuuk apeqquummut 2-mut akissut.

### **b. Attaveqaatit satellitsikkoortut ridium atorlugu attaveqaannassappat?**

**Akissut:** Innuttaasut Iridium satellit-ikkut oqarasuaatit suli atorsinnaavaat. Iridium satellit-ikkut oqarasuaateqarnermut tunngatillugu pissutsinik allanngortoqarsimanersoq imaluunniit allanngortoqassanersoq, Naalakkersuisut ilisimangilaat.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Erik Jensen